



## 阿興个望想

冬節官到，像刀樣个冷風斯一路劈來咧，冷颼颼个風，對阿興个衫領、衫袖鑽往入，在圍身迂一輪了，跔肚臍下个開口溜出來，阿興牙根齧緊，礫礫砣砣个雞嫲皮，拏毋平，勻勻鋪歸身，斯同該正擲撇毛个雞皮共樣。還寒哦！交(kau+)風个面頰緬繃繃，因致牙根出力，分該原旦斯歪一片个闊嘴，這下看起來越致歪孬，還嫲哦，鏡肚个自家，實在係屙痢毋得！

寒囉囉个天時，尿又特別多，對座位蹶跣來，對阿興來講係大工程，無已載力个腳，癱癱个手，尸肚愛隨時準備核，半爛燦該手腳毋聽講，玄玄風斯會分佢頓去必析哦。真無簡單蹶跣來咧，「呼！」啟下氣，企畀在，驚分阿興撞著，共樣手腳無已生活个同學，這下逐個都閃遠遠，暫時分佢恁泥橫打直過。徒步，過徒步，怪奇，明明蹶到頭前，做麼顛倒打卵退？新打个鐵鞋綑在腳項，看起來有頭家个派頭，到徒步該下正知，唉，有罇重！

食飯係盡歡喜个事頭，打早斯分交通車載出門个阿興，官到半晝，肚屎斯噤哩咕嚕打鼓咧，飯菜香對三樓衝上六樓來，仰脣安棧得？簡簡單單个入袋手工，分胃腸一搥，十五隻放一堆，較算都毋著，較點都毋清，張袋个志工阿姨頭緊拂，「阿興哪，又毋著哩啲！」唉，堵著食這層事，肚屎一枵頭斯暈，毋單淨手腳無力，連頭那肚个東西都作怪哦！歸班七、八個人坐一張桌，先生將飯同菜張入阿興个大碗公肚，上背還過放一坵焗个豬排，「使得食咧，等下俚正同你剪細坵。」先生講。抓著湯匙，鏟入碗公肚，半口都官吞著，斯搥去歸桌咧，幾下到碗公還險險跌落桌下，將就用頭那角緊碗公，阿姆哀，愛食佢都難哦，該載志工阿姨遽遽過來搵手，三、四十歲咧，嘖恁大人還愛人搵飼，講起來有罇見笑！

「阿興，這恁久行路有較進步哦，加油兜，手腳廉輒咧斯使得去庇護工廠做事，加賺兜錢好討舖娘哦！」聽著這兜話，阿興嘴角翹往上，目神肚，有歡喜，有盼望，正常个人生，在厥心肝肚，千轉百轉複習了又複習，毋知幾多萬萬遍咧，佢乜想愛心邊有人，乜想愛有屬於自家个家庭，這兜曾係妄想？哪日正會實現？單純个阿興，無怨嘆，淦淦个望想，日日期待，總有一日會做下實現。

作者：劉玉蕉

### ☆詞彙學習☆

【交風】kau+ fung+：受風侵襲。

【越致】rheḍ` zhi`：更加。

【歪孬】uai+ fe`：歪斜不正。

【屙痢毋得】o+ li` m` ded`：糟透了。

【載力】zai` lid`：承受力量。

【必析】bid` sag`：裂開。

【緬繃繃】hen` bang` bang`：繃得很緊。

【安棧得】on+ zan+ ded`：定下心。

【角緊】gog` gin`：頂著圈住。

【嘖恁大人】sai+ an` tai` ngin`：猶如華語的活那麼大把歲數，粗魯的說法。

【廉輒】liam` ziaḍ`：俐落。

【千轉百轉】cien+ zhon` bag` zhon`：千百回。